

Proxecto de Orde do/2016, do, polo que se modifica o módulo de financiamento do servizo de axuda no fogar a persoas en situación de dependencia.

TEXTO:

(Escribir a dous espazos)

En uso da competencia exclusiva que o artigo 27.23 do Estatuto de autonomía lle reconece á Comunidade Autónoma galega, o Parlamento de Galicia aprobou a Lei 13/2008, do 3 de decembro, de servizos sociais de Galicia, que define e regula o sistema galego de servizos sociais como servizo público, destinado a garantir a igualdade de oportunidades no acceso á calidade de vida e á participación social de toda a poboación, mediante intervencións que permitan o logro dos obxectivos estratéxicos do sistema. A propia lei, que foi o resultado dun amplo proceso de participación e dos traballos realizados no marco do diálogo social de Galicia, no seu artigo 3, concreta eses obxectivos, que perfilan o ámbito propio dos servizos sociais: facilitar recursos e itinerarios de inclusión social, garantir a autonomía persoal das persoas dependentes, brindar protección e oportunidades sociais e educativas aos menores, facilitar a conciliación da vida laboral e familiar e, en xeral, ademais, previr a aparición de situacións de exclusión, dependencia, desigualdade ou desprotección dos máis vulnerables.

Así mesmo, a Lei 39/2006, do 14 de decembro, de promoción da autonomía persoal e atención ás persoas en situación de dependencia, configura, no seu título I, o sistema para a autonomía e atención á dependencia como «unha rede de utilización pública que integra, de forma coordinada, centros e servizos, públicos e privados», regula as prestacións do sistema e prevé un catálogo de servizos que, de acordo co seu artigo 3, se deben integrar nos sistemas de servizos sociais das comunidades autónomas, no ámbito das competencias que teñen asumidas.

“A través do Decreto 99/2012, do 16 de marzo, polo que se regulan os servizos sociais comunitarios e o seu financiamento, modificado polo Decreto 148/2014, do 6 de novembro, regúlase, entre outros aspectos, un novo marco para o financiamento dos servizos sociais comunitarios de titularidade municipal, de maneira que se melloran aspectos clave para as facendas locais, como son a continuidade e estabilidade, así como a economía procesual e consecuente celeridade na xestión dos pagamentos. Para iso prodúcese un cambio desde un procedemento baseado na convocatoria anual de subvencións a outro de transferencias de ciclo anual, de acordo co procedemento que este decreto regula, garantindo, en todo caso, unha transición que non prexudique a calidade e a continuidade duns servizos

fundamentais prestados á cidadanía polas corporacións locais. Esas transferencias, no caso do servizo de axuda no fogar (SAF) para persoas en situación de dependencia valorada e con dereito recoñecido de atención, realizaranse de maneira regular en función das horas de atención efectivamente prestadas, para o cal se empregará un sistema de información compartido entre a Xunta de Galicia e as corporacións locais titulares dos servizos.

O artigo 58 regula o financiamento, pagamento e xustificación dos servizos de axuda no fogar para persoas en situación de dependencia valorada con dereito de atención recoñecido, establecéndose no Anexo III, apartado A) o módulo de financiamento a aplicar fixado en 9,7€ por hora efectiva atención xustificada a persoas con Programa Individual de Atención de servizo de axuda no fogar.

Na disposición adicional primeira do Decreto 99/2012, do 16 de marzo, no seu punto primeiro, establécese que se autoriza á persoa titular da consellería competente no sistema galego de servizos sociais para modificar, mediante orde, a estrutura e contías dos módulos de financiamento recollidos no anexo III e no artigo 47 deste decreto, coa finalidade de adaptalos ao desenvolvemento da efectividade do dereito ás prestacións de dependencia conforme ao previsto na disposición primeira da Lei 39/2006, do 14 de decembro, de promoción, de promoción da autonomía persoal e atención ás persoas en situación de dependencia, e ao que a normativa reguladora das titulacións universitarias e títulos e cualificacións profesionais, así como ás variacións do IPC galego.

Transcorridos catro anos dende a aplicación deste módulo de financiamento, cómpre realizar unha modificación do módulo de financiamento para adaptalo a realidade concreta de cada concello/mancomunidade, evitar a regularización dos excesos de remanentes declarados a través da xustificación e avaliación do proxecto anual de servizos sociais, concretar a participación das persoas usuarias no custo dos servizos e conseguir unha maior eficiencia na prestación do servizo de axuda no fogar a persoas en situación de dependencia para posibilitar o incremento da atención.

Na súa virtude, en uso das facultades que teño atribuídas pola Lei 1/1983, do 22 de febreiro, de normas reguladoras da Xunta e da súa presidencia, o Decreto 99/2012, do 16 de marzo, polo que se regulan os servizos sociais comunitarios e o seu financiamento, e o Decreto 176/2015, do 3 de decembro, polo que se establece a estrutura orgánica da Consellería de Política Social,

RESOLVO:

Artigo Único. Modificación do Anexo III, do Decreto 99/2012, do 16 de marzo, polo que se regulan os servizos sociais comunitarios e o seu financiamento.

Modifícase o Anexo III, apartado A) do Decreto 99/2012, do 16 de marzo, que queda redactado da seguinte maneira:

<<Criterios para o financiamento do servizo de axuda no fogar (SAF):

A) Garantía de financiamento da renovación anual do servizo de axuda no fogar para persoas valoradas coma dependentes con dereito de atención recoñecido na correspondente resolución do programa individual de atención.

Módulo económico a aplicar: A aportación da Xunta será igual á diferenza entre o custo do servizo, declarado polo concello na xustificación e avaliación do proxecto anual de servizos sociais no ano inmediatamente anterior ao exercicio corrente, menos o importe da participación da persoa usuaria no custo do servizo, por hora efectiva de atención xustificada a persoas con Programa Individual de Atención de servizo de axuda no fogar.

En todo caso a aportación por parte da Xunta de Galicia será dun máximo de 9,7€ por hora efectiva de atención xustificada a persoas con Programa Individual de Atención de servizo de axuda no fogar.>>

Disposición transitoria única. *Mantemento do volume de financiamento aos Concellos.*

1. En todo caso, e coma consecuencia da aplicación do novo módulo de financiamento, garantirase o nivel de financiamento aos Concellos correspondente ao exercicio anterior segundo o disposto no apartado seguinte.

2. No suposto de que coma consecuencia da aplicación do novo modelo de financiamento se estime que se producirá unha minoración no nivel de de financiamento dun Concello/Mancomunidade con respecto ao exercicio anterior, realizarase un incremento na asignación de horas para a prestación do servizo de axuda no fogar a novas persoas en situación de dependencia equivalente ao importe da minoración estimada.

3. En todo caso, o mantemento do incremento do volume de persoas beneficiarias anualmente estará supeditado á variación que experimenten os custos do servizo, declarado polos **concellos** na xustificación e avaliación do proxecto anual de servizos sociais no ano inmediatamente anterior ao exercicio corrente, e á dispoñibilidade orzamentaria prevista na Lei de **orzamentos xerais** da Comunidade Autónoma de Galicia para o financiamento, a través de transferencias de financiamento ás entidades locais, do servizo de axuda no fogar a persoas en situación de dependencia.

Disposición derradeira primeira. *Habilitación competencial*

Autorízase á persoa titular da dirección xeral con competencia en materia de dependencia da Consellería de Política Social para ditar as disposicións que sexan necesarias para o desenvolvemento e aplicación desta orde.

Disposición derradeira segunda. *Entrada en vigor*

Esta orde entrará en vigor o un de xullo de dous mil dezaséis.

Santiago de Compostela, ... de de 2016

O Conselleiro de Política Social